

He aha māu hei āwhina i tō tamaiti?

Me tautoko

Ehara i te mea e kaingākau ana te katoa ki te pāngarau, engari ko tātou katoa e whakamahi ana i te pāngarau i roto i ngā kaupapa maha o ia rā. Nō reira he kaupapa whaihua tonu te pāngarau mā tō tamaiti. Mā te tautoko a tōna whānau e eke panuku ai ia i tēnei kaupapa ako. Ka āwhina anō koe i tō tamaiti ki te ako i te pāngarau, pērā i tō āwhina ki te pānui pukapuka? E whakaatu ana koe i te kaingākau ki te mahi pāngarau a tō tamaiti? Ko tāu, he whakatauirā – ki te kaingākau koe ki te pāngarau, koia hoki ka kitea i tō tamaiti.

He mea nui kia aro pai koe ki te pānui pukapuka a tō tamaiti, tāna mahi tuhituhi, āna tākaro, hākinakina hoki. Me pērā anō hoki tō aro ki āna mahi pāngarau.

Me whakarongo

Ko tā te kaupapa o Te Poutama Tau, he whakatenatena i te tamaiti kia āta whakaaro ki ngā rautaki whakaoti rapanga maha, me te whakamārama anō i aua rautaki ki tāngata kē. Nō reira me āta whakarongo ki ngā whakamārama a tō tamaiti. He rerekē pea tāna rautaki i tāu, engari pea kei te tika tonu. He maha ngā rautaki rerekē ka whakamahia e tō tamaiti ki te whakaoti rapanga. Me āta whakatenatena ia kia whakamārama i ōna whakaaro. I ētahi wā pea ka whakamahi rauemi ia (pērā i te kākano, i te porotiti rānei), hei whakamārama i ōna whakaaro, he wā anō ka tuhi pikitia, ka tuhi whārite rānei. Kia kaha hoki koe ki te whai i ngā rautaki maha!

Me āta whakatenatena kia mahi pāngarau ia

Kei ngā wāhi katoa te pāngarau! He nui ngā horopaki o ia rā hei whakamahi mā tō tamaiti i tōna mātauranga pāngarau.

Mēnā kei te ako tō tamaiti ki te tatau, taturia ngā mea katoa! Tatauria ngā kaupae o tētahi ara piki; taturia ngā taonga tākaro kei runga i te papa; taturia ngā motukā e hipa atu ana; taturia ngā mea katoa. Mā te tatau, e pakari ai tō tamaiti ki te tatau.

Mēnā kei te ako tō tamaiti ki te tāpiri, tāpirihia ngā mea katoa! Tāpirihia ngā mea māmā, pērā i te maha o ngā naihi me ngā paoka i te tēpu; tāpirihia ngā mea āhua uaua ake, pērā i te utu o ngā mea e hokona ana i te hokomaha. Kua hoki e wareware ki te mahi tangotango.

Pātaihia atu tō tamaiti he aha āna kaupapa pāngarau i te kura, ka whakamahi ai i aua kaupapa i roto i ngā mahi o ia rā. Mēnā kei te ako ia i te hautau, me tuku pātai ki a ia mō te hautau, pērā i te whiriwhiri i te hautanga o ngā mea tāne i tō whānau, me te whiriwhiri i te hautanga o te miraka e toe ana i te ipu. Mā ēnei momo whiriwhiringa e pakari ai ia, e mōhio anō ai ia ki te whakamahinga o te pāngarau i ngā kaupapa o ia rā.

He horopaki pai ēnei mō te pāngarau:

- Te moni – te tatau me te tātai moni. Moni pūkoro, moni penapena, moni hokohoko ...
- Te ine – te roa o tētahi mea, te tawhiti, te horahanga, te rōrahi, ngā whakaurunga mō te tunu kai...
- Te hāereere – te pānui tau i ngā tohu (te kōhungahunga), te tātai i te tawhiti me te tere (te tamaiti pakeke) ...
- Ngā momo kēmu - Monopori, Wharewhare, kēmu whai papa, Kēmu kāri ...
- Ngā wātaka - wātaka pahi, wātaka tereina, wātaka kura ...